

lis Gnovis

■ **WASHINGTON.** Un pas indevant pai popui natîfs



Si clame Debra Haaland, e à finît 60 agns e, dai 15 di Març, a je il prin fi – e cundiplui une fie – dai popui natîfs dal Nord Americhe ch'al jentre tal guvier dai Stâts Unîts. Il president Joe Biden i à confidât la deleghe pe protezion dai parcs nazionài e dai teritoris. Il dean de maiorance democratiche dal Senât, Chuck Schumer, al à declarât che la nomine e ten cont «de relazion problematichis e complicade fra il guvier federâl e lis nazions originariis che, par masse timp, a son stadis esclududis dai centris dulà che si decît de sò vite e sò tiere».

■ **PORDENON.** Inovazion e inclusion sociâl

Si clame «Hub 381» e al smire di promovi l'inclusion e la coesion mediant de contaminazion culturâl. Il progjet d'innovazion sociâl inviât de Cooperative «Fai» al sarà puartât indevant li dai uficis di Piazzetta del Cristo, tal cûr di Pordenon. Cun «Fai» a colaborin l'Aziende sanitarie dal Friûl occidentâl e il Dipartiment di salût mental. Lis primis ativitâts di «Hub 381» a son stadis dedicadis a la socializazion, a la culture, al jutori scolastic e a la formazion.

■ **RUVIGNE.** Un slaif a lis brentanis dal Tiliment



Ai 20 di Març, il «Comitât a pro dal Tiliment tal Unesco» al à presentât publichementri i progjets idraulics alternativis pe gjestion des brentanis dal Tiliment, curâts dal inzegnîr Gianni Sergio Pascoli. Il «dossier», popolarizât dal Comitât di Cristian Fior e di Luca Campanotto, al pues jessi let fûr par fûr su la rêta des rêts, a la direzion: www.comitato-pro-tagliamento-in-unesco.org/Tagliamento_proposta_alternativa_GENNAIO_2021.pdf.

■ **UDIN.** Cors universitaris par dipendents publics

Al larà indevant fintremai ai 26 di Avrîl il cors fundamentâl di lenghe furlane par dipendents de amministrazion publiche inmaneât vie pal 2021 dal Ateneu regionâl, in grazie de leç 482 dal 1999, e començât ai 22 di Març. Un altri cors, intermedi, al partissarà ai 3 di Mai e al larà indevant insin ai 3 di Jugn. Ducj i doi i cors a son dividûts in 10 lezioni su la plateforme informatiche «Teams» (lunis dopomisdî e miercus, 14.30-17.30). Par informazions e par dâsi in note si pues contactâ il «Cirf» (0432 556480 - cirf@uniud.it - sportel.furlan@uniud.it). Tal lûc web <http://cirf.uniud.it>, si cjate il modul pes prenotazions.

Miercus 24	S. Romul martar	Domenie 28	Domenie Olive
Joibe 25	S. Marie Nunziade	Lunis 29	Lunis Sant
Vinars 26	S. Emanuêl martar	Martars 30	Martars Sant
Sabide 27	S. Guste vergjine	Il timp	Cualchi zornade plovose.



Il soreli
Ai 24 al iève aes 6.02 e al va a mont aes 18.25.



La lune
Ai 28 Lune plene.

Il proverbi
Plui si lavore e plui si à ce lavorà.

Lis voris dal mès
Lassait spazi tal ort anje aes plantis fatis cressi te sere vie pal Invier: latuiss, rucule, râfs, ravanei, cicoriis, spinazis, puars.

Ancjemò furlan te «Rai»

Lis oris par furlan trasmetudis de radio a son passe 100 ad an e dome uns 17 chês Tv

Novante oris di trasmissions radiofonichis par furlan, cu la priorte di altris 17 oris e mieze de Sierade stade, rionzudis cun 16 oris e mieze di trasmissions televisivis. In zornade di vuê, tal servizi public de «Rai», e je cheste l'ufierte d'informazion e di programis in marilenghe. Ma saraial mai pussibil otignî altris spazis par culture, spettacul e altre informazion? Cheste cuistion e je stade proponude de Assemblee de Comunitât linguistichis furlane («ACLiF»), intant de convigne inmaneade ai 13 di Març in video, dulà che si à stazât anje ce ch'al sucêt fûr dai confins de Patrie. In specialitât, si à profundît ce ch'a stabilissin i compatâts riservâts a chês altris Comunitâts linguistichis in Italie, cuant ch'a mancin mancun di 50 dis prin ch'e sedi rinovade la convenzion fra Guvier e «Rai» in cont di trasmissions par furlan te Region Friûl-V. J. Il confront, inmaneât di «ACLiF», cul jutori di «ARLeF» e di Societât Filologjiche Furlane e cul patrocini de «Rai» e de Region, al à vût par protagoniscj puarte vôs des Comunitâts ladine de Provincie autonome di Bolzan, francese de Valade di Aoste e sardegnole. In Sudtîröl, par un esempli, i palinsescj de «Rai» a àn un fuart implant informatif: par todesc i telegjornâi a son 2 in di e i notiziariis radiofonics 11; par ladin a 'nd è 1 telegjornâl e 2 notiziariis par radio. Cun di plui, si à di zontâ lis rubrichis cuotidianis e chês setemanâls, cun profundiments gjornalistics, rassegne stampe, gnovis meteorologjichis e su la viabilitât. Dongje de informazion,



Intant de convigne di «ACLiF», si à discorût su la presince des lenghis mancun pandudis tal servizi public

si à une ufierte slargjate di trasmissions par todesc, par talian e par ladin di caratar ricreatif, educatif e culturâl. Intant de convigne, al à stât proferît anje il dât des scoltis: ogni di, 180 mil telespetatôrs, su 300 mil abitants de Provincie, a cjalin lis trasmissions televisivis todescjis; là che, invezit, i spetatôrs dai programis par ladin a son plui di 40 mil in di. Te Valade di Aoste, la redazion «Rai» e propon 380 oris di notiziariis Tv e 150 oris di notiziariis par radio, ad an; fra chestis, lis oris di Tv par francès a son 26 e 32 chês di radio. Al «patois valdostan», ch'al è ricognossût de Region, a son dedicadis altris 78 oris di Tv e 110 di radio, cun trasmissions d'intrateniment, massime tes domenîis. Te Sardegne, no si fâs informazion par sardegnûl, ma a son proviodûts

dome spazis di culture e d'intrateniment. Pal president de Assemblee de Comunitât linguistichis, Markus Maurmair, ch'al è anje sindic di Voleson e di Darzin, par che l'ufierte «Rai» par furlan e cressi al vûl impastanât un «confront permanent dulà che si met adun lis propuestis e lis ideis e si pretint cun fuarce la presince d'informazion e di programazion televisive». Seont il president dal Consei regionâl, Piero Mauro Zanin, e covente «un'informazion par furlan mediant telegjornâi e, par chel, al vûl potenziade la strutture «Rai» udinese». Orepresint, la convenzion dal 2017 e stabilis, pe Comunitât slovene, 4 mil 517 oris di trasmissions radiofonichis par sloven ad an, in plui di 208 oris di trasmissions televisivis.

Monika Pascolo

Peraulis in dismentie par cure di Mario Martinis❖❖❖ **PLERE**

s.f. = imbuto, arnese per travasare liquidi (dal verbo latino implere "riempire, colmare")
Ti covente une plere plui piçule par travasà il vin de damigiane.
Ti serve un imbuto piû piccolo per travasare il vino dalla damigiana.

❖❖❖ **PLET**

agg. = curvo, incurvato (detto di persona)
(dal participio passato latino plicatus "piegato", da plicare "intrecciare, piegare")
Toni al è diventat vieli e plet.
Antonio è diventato vecchio e curvo.

❖❖❖ **PLETE**

s.f. = piegatura, ripiegatura
(dal latino plicata "piega", da plicare "intrecciare, piegare")
Lis pletis de cotule a son masse largjiis.
Le pieghe della gonna sono troppo larghe.

❖❖❖ **PLUSÔRS**

agg. = parecchi, molti (antica parola friulana)
(dal latino *pl si r s, comparativo di pl s)
A son rivâts plusôrs zovins di Tarcint cu la corriere.
Ce ne sono parecchi giovani di Tarcento con la corriera.

❖❖❖ **POC**

s.m. = cozzo; stelo, ramo mozzato; parte ingrossata del ceppino di radicchio che si trova tra la radice e le foglie; estremità; teste tronche che sporgono oltre la spalliera delle sedie (etimologia dubbia)
Dopo cjonçât il penacul de blave al reste il poc.
Dopo aver tagliato il pinnacolo del mais rimane il ramo mozzato.
Ogni Invier o soi golôs di mangjà il lidric cul poc.
Ogni Inverno sono goloso di mangiare il radicchio col cespo.